

लूका री लिक्खेरी खुशखबरी

इस कताब मिन्ज असी येशू जी रे बारे मिन्ज ए सिक्खदे कि से इस्त्राएल कने पूरी दुनिया रे पापां जो माफ करणे ताई इस धरती पर आए थिये। लूका ने ए कताब खास कर गैर-यहूदी मणूआं ताई लिक्खेरी है। येशू जी इस धरती पर मणू रा रुप लेई करी आए कने तिन्हा बमार मणूआं जो खरा कित्ता कने जिन्हा मिन्ज बुरी आत्मा थियां, तिन्हा का छुड़ाया कने से तिन्हा मणूआं ताई आए जेड़े जे परमात्मा रे रस्ते पर नी चलदे थिये, किजोकी से मणू मूर्तियां जो ही अपणा परमात्मा समझदे थिये कने दुनिया रे मोह-माया मिन्ज ही फसी गेरे हिन। इस कताब मिन्ज येशू जी रे जमीणे का लेई करी तिन्हेरा बचपन, जुआनी, कने सारे काम्म जे तिन्हा अपणी सेबकाई रे बेल्ले मिन्ज कित्ते, तिन्हा सबनी गल्ले रे बारे मिन्ज बड़े छैळ तरीके कने दस्सेरा है। किय्यां पवित्तर आत्मा काम्म करदा, कने तिसेरे चमतकार बी इस कताब मिन्ज दस्सेरे हिन। येशू जी स्वर्ग मिन्ज किय्यां गे थिये, ए सब किच्छ असी इस कताब मिन्ज पता लाई सकदे। होर ता होर इस कताब मिन्ज स्वर्गदूतां रे बारे मिन्ज, प्राथना करणे रा फाएदा, परमात्मा री खुशखबरी फैलाणे मिन्ज जनानियां रा काम्म, कने परमात्मा पर बिस्वास करणे रे बारे मिन्ज मता किछ सिखणे जो मिलदा। ए कताब सिरफ कुस्की खास जात या धर्म या अमीरां ताई ही नी है, अपण, दुनिया रे सबनी मणूआं ताई है फिरी चाए से छोटा हो या बड़ड़ा, पापी हो या बड़ा दानी हो, कने चाए मणू हो या जनानी। बड़ड़ी गाल्ल ता ए है कि येशू जी धर्मी ताई नी अपण पापी मणूआं ताई इस धरती पर आए थिये कि से बी परमात्मा जो जाणी सकन कने पाप री सजा का बची सकन।

मैहरमी

¹ थियुफिलुस जी, येशू मसीह जी ने इस धरती पर जेहड़े काम्म कित्तेरे हिन, तिन्हा कम्मा रे बारे मिन्ज मते मणूआं ने लिक्खेया। ² ते इन्हा सबनी कम्मा री जानकारी आम मणूआं ताई पुजाणे वाळे येशू जी रे से चेल्ले हिन जिन्हा ने ए सब किछ अपणी हाक्खी कने हुन्दा दिक्खेया, किजोकी से सुरु का ही येशू जी कने थिये, कने चेल्लेयाँ जो छड़ड़ी करी असां जो उन्हा मणूआं का बी थोड़ी जानकारी मिलि, जेहड़े जे तिस बेल्ले तित्ते थिये। ³ इधरे ताई येशू जी रे पैदा होणे का लेई करी स्वर्गा मिन्ज जाणे तक रे बारे मिन्ज सारी जानकारी जो खरा-करी परखी-पुरखी लैणे का बाद में ए फैसला लिक्खेया, कि येशू जी ने जे किच्छ बी बोल्लेया, तिन्हेरे बारे मिन्ज में तुसां जो (थियुफिलुस जी जो) ध्यान कने ते पूरा सहई सहई लिक्खां, ⁴ ताकि थियुफिलुस जी, तुसी ए जाणी सकन कि जिन्हा गल्लां जो तुसां ने सिक्खे रा है कने जिन्हा गल्लां जो तुसी सच्च्य मन्दे, से पूरी सहई ते कने पक्की हिन।

"यूहन्ना" बपतिस्मा दैणे वाळे रे पैदा होणे री घोसणा

⁵ यहूदिया रा इक देश थिया, तित्ते हेरोदेस ना रा मणू राज करेया करदा थिया। तिस बेल्ले अबीय्याह नां री इक याजकीय मड़ण्ठी थी, तिस मिन्ज जकरयाह ना रा याजक* थिया कने तसेरी लाड़ी रा नां इलीशिबा थिया, जेड़ी जे हारून रे याजकिय टब्बरे री थी। ⁶ जकरयाह ते इलीशिबा परमात्मा री नजरा मिन्ज धर्मी*^a थिये। कने से परमात्मा रे सबनी हुकमा कने रीति रवाजां पर पूरी लगन कने चलदे थिए। ⁷ अपण इलीशिबा इक ओत्तर जनानी थी, इधरे ताई तन्हेरे कोई निके-निके नी थिये, कने से दोनो जणे बड़े सियाणे थिए होई गरे।

⁸ जिस बेल्ले जकरयाह मण्डळी री बारी मन्दर मिन्ज याजक*^b रा काम्म करणे ताई आई, ⁹ तां याजकां रे रिवाज रे साहब कने पर्ची जकरयाह रे नां री निकळी, कि से परमात्मा रे मन्दर रे पवित्तर जगाह मिन्ज जाई करी धूप बाळे। ¹⁰ जिस बेल्ले

^a1:6 धर्मी* दिल रे भोळे ते परमात्मा रे रस्ते पर चलणे वाळे

^b1:8 याजक* परमात्मा रे मन्दर मिन्ज काम्म करणे वाळे लोक, जिय्याँ कि आज-काल रे पुजारी हुन्दे।

धूप बाळणे री बारी आई ता मण्डळी रे सारे मणू कडीह करी बाहर प्राथना थिये करेया करदे। ¹¹ जकरयाह हल्ले मन्दर मिन्ज ही थिय्या, कि तित्ते तिस जो परमात्मा रा इक स्वर्गदूत खड़ितेरा दिसेया, जेड़ा जे धूप री थड़ी रे सज्जे पासे आई खड़ितेया। ¹² जकरयाह स्वर्गदूत जो दिक्खी करी बड़ा घबराई गया, जिहय्यां तसेरे प्राण ही मुह्मां आई रे होन। ¹³ अपण तिस स्वर्गदूत ने उस जो बोल्लेया, "कि जकरयाह, डरा मत ! किजोकि परमात्मा ने तेरी प्राथना सुणी लेई, अवे तेरी लाड़ी इलीशिबा ने, जेड़ी जे ओत्तर थी, दुपराणी होणा कने तिन्ने इक निक्का जमणा। तू तिस निक्के रा नां यहुन्ना रक्खेयाँ। ¹⁴ तसेरे पैदा होणे पर तिज्जो ता खुसी होणी ही होणी, कने तिन्ने जिस बेल्ले बड़ड़े होणा ता होरनी मणूमां ताई बी खुसी री वजाह बनणा। ¹⁵ किजोकि तिन्ने प्रभु री नजरा मिन्ज खास मणू होणा, ते कदि बी दाखरस कने शराब नी पीणी, तिन्ने अपणे पैदा होणे का पैल्ले ही पवित्तर आत्मा कने परिपूर्ण होणा है होई गरे। ¹⁶ तिन्ने इस्त्राएल रे मते सारे मणूमां जो तन्हेरे प्रभु-परमात्मा रे पास्से लेई करी आणे ताई तिन्हा जो तियार करणा। ¹⁷ तिन्ने परमात्मा री सकित मिन्ज होई करी लोकां जो परमात्मा रे बारे मिन्ज सकसा दैणी, जिय्याँ एलिय्याह बी करदा थिया। ते तिन्ने येशू जी रे आणे का पैल्ले ही मणूमां रे दिलां जो बदलणा सुरु करी दैणा कि माँ-प्यो अपणे निके-निके कने प्यार कने रहन, ते जे बोल्ला नी मन्दे, तिन्हेरे दिलां जो बदली करी भोळा करी-करी परमात्मा रे रस्ते पर चलणे वाळा बणाई दैणा। ए सब तिन्ने मणूमां जो परमात्मा पासे करणे ताई करणा। ¹⁸ तां जकरयाह ने स्वर्गदूत जो पुच्छेया, कि मैं किहयां मन्नी लेंयां कि ए सब सच्च होई जाणा है? किजोकी, मैं ता बड़ा सियाणा मणू है कने मेरी लाड़ी बी सियाणी है। ¹⁹ तां स्वर्गदूत ने तिस जो बोल्लया, मैं जिब्राईल है, मैं ओ स्वर्गदूत है जेहड़ा हर बेल्ले परमात्मा रे अग्गे खड़ीह रहन्दा। मिन्जो परमात्मा ने तेरे का इधरे ताई भेज्जेया कि ए खुसखबरी मैं तिज्जो अप्पू सुणाई आँ। ²⁰ अपण दिक्ख, अब्बे मैं जे किच्छ बी तिज्जो दस्सया, तिनहा गल्लां पर बीस्वास नी करी-करी तैं इक गलती करी रक्खी, इधेरी सजा ए होणी कि अवे जां ताई तेरा निक्का पैदा नी होई जान्दा, तां ताई तैं जहल्ले रहणां। ²¹ ते मणू जकरयाह रे मन्दर का बाहर आणे री भाळ मिन्ज थिए, कने तिन्हा जो ए गाल्ल खाई चलेरी थी की से एड्डी हाण अन्दर रुकेरा किजो है? ²² फिरी जिस

बेल्ले से बाहर आया तां तिसका गल्ल ही नी थी होया करदी। तसेरी ऊट-पटाँग (पुढी सिद्धी) हरकताँ दिक्खी करी मणू समझी गे, कि इन्ने मन्दर मिन्ज जरूर परमात्मा रा कोई दर्शन दिक्खया होणा। ²³ फिरी जिस बेल्ले जकरयाह रे मन्दर मिन्ज सेवा करणे रे दिन पूरे होई गे, तां से अपणे घरे जो हटी आए। ²⁴ थोड़े दिनां बाद, इलीशिबा दुपराणी होई कने से पन्ज मिहने ताई मणूआं का बक्खरी रेहई। ²⁵ कने तिधका बाद बोलणा लगी, कि परमात्मा किन्ना खरा है, कि तिन्हा ने मेरी सुणी लेई ते में बी दुपराणी होई गई। परमात्मा ने मिन्जो मणूआं अगगे मूह दसणे जोगगा कित्तेया।

"दुनिया रे मसीह" रा पैदा होणा

²⁶ इलीशिबा जो जिस बेल्ले छेम्मा मिहना थिय्या लग्गेरा, तिस बेल्ले परमात्मा ने जिब्राईल स्वर्ग दूत जो गलील रे नासरत सैहर मिन्ज इक कुंआरी कुड़ी का भेजया। ²⁷ तिस कुंआरी कुड़ी रा नां मरियम थिया। तिस कुड़ी री मंगणी यूसुफ ना रे इक मणू कने होए री थी जेड़ा जे सबनी राजेयाँ मिन्ज का खास राजा "दाऊद" रे टब्बर रा थिया। ²⁸ जिब्राईल मरियम का आई करी बोलणा लगेया, तेरी जै हो ! तेरे पर परमात्मा ने दया कित्ती, ते से तेरे कने हिन। ²⁹ इस गल्ल का घबराई करी मरियम इस सोच मिन्ज पेई गई कि स्वर्ग दूत री इनाह गल्ला रा कै मतलब है? ³⁰ तां स्वर्ग दूत ने मरियम जो बोल्लेया, डरां मत, किजोकि परमात्मा तेरे पर खुस हिन कने तिन्हा ने तिज्जो असीस दैणी। ³¹ दिक्ख मरियम, तैं दुपराणी होणा ते इक निक्के जो पैदा करणा, जिसेरा नां तू येशू रखेयां। ³² से निक्का बड़ा खास होणा कने तिस्सो मणूआं ने परम-परमात्मा रा निक्का मनणा कने होर ता होर, परमात्मा ने तिस्सो "दाऊद राजा" साई इक राजा बणाई दैणा। ³³ कने तिनि ए सारी उमर ताई इस्त्राएलियां रे राजे बणी करी ही रहणा कने तिसेरा राज-पाठ कदी नी मुकणा। ³⁴ ए सुणी करी मरियम ने स्वर्गदूत जो बोल्लेया, इहय्यां ता होइ ही नी सकदा, किजोकी मेरा ता कुस्की बी मदद कने कोई सरीरिक-नाता नी है। ³⁵ तां स्वर्गदूत ने मरियम जो बोल्लेया, कि पवित्तर आत्मा ताई किच्छ बी करणा मुस्कल नी हुन्दा। तिन्ने इक इदेहया चमत्कार करणा कि तिज्जो दुपराणी होणे ताई दुनियावी विधि अपनाणा ही नी पोणी। फिरी जिस निक्के जो तैं पैदा करणा तिन्ने परमात्मा रा निक्का मन्नया जाणा, कुस्की मणू रा नी। ³⁶ होर ता होर, तेरी रिश्तेदार इलीशिबा, जिस जो सब मणू ओत्तर बोलदे

थिए, से बी दुपराणी है होई गेरी कने तिस्सो अब्बे छेम्मा म्हीना लग्गे रा है।

³⁷ किजोकी परमात्मा री बोलेरी हर इक गाल्ल पूरी होई करी ही रहन्दी। ³⁸ फिरी मरियम बोलदी, मैं बी परमात्मा जो मन्दी, कने अवे परमात्मा जिय्याँ बी चाहन मेरे कने तिय्याँ ही होणा चाहिंदा। फिरी से स्वर्गदूत तित्ते का चली गया।

मरियम रा इलिशिबा इक-दुजे कने मिलदे

³⁹ थोड़े रोजां बाद मरियम यहूदिया रे इक पाहडी सैहरा जो चली गई। ⁴⁰ फिरी से जकरयाह रे घरे गई कने तिन्ने जकरयाह री लाड़ी, इलीशिबा जो नमस्ते कित्ती। ⁴¹ कने ईहय्यां होया की जिस बेल्ले इलीशिबा ने मरियम का नमस्ते सुणेया ता, तियां ही इलीशिबा रे पेढा मिन्ज निक्का उटकी पेया कने इलीशिबा पवित्र आत्मा मिन्ज परिपूर्ण*^c होई गई। ⁴² ते से मरियम जो जोरे जोरे बोलणा लगी कि तू सबनी जनानियां मिन्ज का बड़ी जादा भागा वाळी है कने जिस निक्के जो तैं जमणा, से बी बड़े भागा वाळा है। ⁴³ ए ता मेरे तांई बड़ी बड्डी गाल्ल है कि मेरे प्रभू री माँ अप्पु ही चली करी मेरे कने मिलणा मेरे घरे आई रेई। ⁴⁴ किजोकी जिय्याँ ही तुसां ने मिन्जो नमस्ते कित्ती, तिय्याँ ही मेरे पेढा मिन्ज निक्का खूसी कने उटकी पेया। ⁴⁵ तू धन्न है किजोकि तैं ए विस्वास कित्तेया कि परमात्मा ने जे बोल्लया थिय्या से होई करी ही रहणा।

परमात्मा री स्तुती तांई मरियम रा गाणा

⁴⁶ तां मरियम ने बोल्लेया,

कि मैं अपने परमात्मा री मन का स्तुति करदी। ⁴⁷

मेरी आत्मा मेरे उद्धार*^d करणे वाळे परमात्मा का बड़ी भारी खुस है। ⁴⁸

तिन्हा ने मेरे पर मैहर कित्ती,

कने आज का बाद सबनी मणूआं ने मिन्जो बोल्लणा की तू धन्न है। ⁴⁹ परमात्मा,

^c1:41 पवित्र आत्मा मिन्ज परिपूर्ण* पवित्तर आत्मा रे सिखाणे/बोलणे पर काम्म करणा।

^d1:47 उद्धार* लोकां रे सारे पापां जो मुफ्त मिन्ज ही माफ करणे वाळे परमात्मा

जे जे सबनी का जादा शक्तिसाली हिन, तिन्हेरा नां पवित्तर है,
 किजोकी तिन्हा ने मेरे ताई बड़े बड़्डे बड़्डे काम्म कित्तेरे हिन। ⁵⁰
 कने तिन्हेरी मैहर उन्हा सबनी मणूआं पर है जेहड़े कि तिन्हेरा डार मनदे,
 उनाह मणूआं पर तिन्हेरी मैहर पीढ़ी का पीढ़ी ताई बणी रहन्दी। ⁵¹
 सक्तिसाली परमात्मा ने अपनी बाँईय्याँ रा जोर दखाया,
 कने जेड़े अपू जो बड़ा सक्तिसाली समझदे थिये, तिन्हा घमण्डियाँ रा घमण्ड
 तोड़ी दित्तेया। ⁵²
 तिन्हा ने राज्जेयां जो तिन्हेरे राज-पद का हटाई दित्तेया,
 कने निम्ते मणूआं जो तिन्हेरी जगाह पर बठाया। ⁵³
 ने भुक्खेयाँ जो खरी खरी चीजां कने रजाया,
 अपण अमीरां जो किच्छ बी नी दित्कनेया। ⁵⁴
 तिन्हा ने अपने इस्त्राएली मणूआं पर मेहर कित्ती,
 जिय्याँ कि तिन्हा ने पुरखां जो अपने वचना का बोलेरा थिया, ⁵⁵
 तिन्हा ने अपने मणूआं पर मैहर रखणी इस गाल्ल जो चेतता रक्खेया,
 कि तिन्हा ने अब्राहम कने तिसेरे टब्बरां पर मैहर हमेसा रखणी,
 जिय्याँ तिन्हा ने म्हारे पुरखां जो बोलेरा थिया। ⁵⁶ मरियम कोई त्रै म्हिने ताई
 इलीशिबा कने रेहई कने तिसेरे बाद से अपने घरे जो हटी गई।

युहन्ना बपतिस्मा दैणे वाळे रा पैदा होणा

⁵⁷ फिरी इलीशिबा रा लौकिहणे रा बेल्ला आई गया कने तिसेरे घरे इक निक्का होया।
⁵⁸ तिसेरे गुआहिन्डयां कने रिस्तेदाराँ ने जिस बेल्ले ए गल्ल सुणी कि परमात्मा ने
 तिस पर मैहर कित्ती, ता तिन्हा बी तिस कने बड़ी खुसियाँ मनाईयाँ। ⁵⁹ कने फिरी
 इय्याँ होया, कि अठमे रोज्जे निक्के रा खतना*^e करणे ताई जकरयाह रे रिस्तेदार
 तित्ते आए, कने से तिसेरे प्यो रे ना पर तिसेरा ना जकरयाह रखणा लगी पे। ⁶⁰ तिस्सी

^e1:59 *खतना** इस्त्राएलीयाँ कने परमात्मा रे कित्तेरे वाएदे री निसानी, जिस मिन्ज
 कुस्की रे घरे निक्का पैदा हो ता से अठमे रोज्जे तिसेरे लिंग री अग्गे री चमड़ी नसाणी
 रे तोर पर कटदे थिये, इस रसम जो खतना बोलदे

बेल्ले इलीशिबा बोली पेई, "कि इसेरा ना ता यहून्ना रक्खणा है"। ⁶¹ तां से बोलणा लगे कि तेरे रिस्तेदारों मिन्ज ता ए नां कुसेरा बी नी है। ⁶² तां फिरी तिन्हा मणूआं ने जकरयाह जो इसारा करी के पुच्छेया, कि तू इसेरा कै ना रक्खणा चाहन्दा? ⁶³ कने जकरयाह ने इस गल्ल पर लिखणे ताई इक तख्ती मंगाई ते तिस पर लिक्खी दित्तेया कि इसेरा नां यहून्ना रक्खेया जाए। ए दिक्खी करी सब जणे हैरान होई गे। ⁶⁴ फिरी तिस्सी बेल्ले जकरयाह रा मुंह खुली गया कने मुंह खुलदे ही से परमात्मा री स्तुति*^f करणा लगी पेया। ⁶⁵ कने तिसेरे अक्खी-बक्खी जिन्ने बी मणू थिय्ये, से सब ए दिक्खी करी बड़े डरी गे। इस गाल्ल री खाप्प यहूदिया रे सारे पहाड़ी इलाक्के मिन्ज पेई गेई। ⁶⁶ जिन्हा बी ए गाल्ल सुणी, से अपने मनां मिन्ज सोचणा लगे, कि ए निक्का कदेया होणा? किजोकी इस पर ता परमात्मा रा हाथ है।

परमात्मा री स्तुती ताई जकरयाह रा गाणा

⁶⁷ फिरी यहून्ना रा प्यो, जकरयाह, पवित्तर आत्मा मिन्ज परिपूर्ण* होई गया ते भविष्यवाणी करणा लगेया। ⁶⁸

कि इस्त्राएल रे प्रभु परमात्मा री जै हो

किजोकि तिन्हा ने अपने मणूआं जो बचाणे ताई इक मददगार भेज्जेया, ते अपने लोकां जो पाप का छुड़ाया। ⁶⁹

तिन्हा ने म्हारे ताई अपने भग्त, दाऊद रे टब्बरा का असां जो इक बचाणे वाळा दित्तेया। ⁷⁰

जिहय्यां कि तिन्हा ने बड़े पैल्ले अपने पवित्तर भविष्यवक्तां का वचना रे जरिए,

जेड़े जे दुनिया रे सुरु हुन्दे का ही आया करदे हिन, बोल्लेया थिय्या, ⁷¹

तिन्हा ने म्हारे दुसमणा का ते तिन्हा सबनी जणेयाँ का, जेहड़े कि असां का रहइदे,

तिन्हा का असां जो बचाणे रा वचन दित्तेया थिय्या। ⁷² ते म्हारे पुरखां पर मैहर दखाणी कने अपने पवित्तर वाएदे जो चेता रक्खणा है। ⁷³ ते से कसम

^f1:64 स्तुति* परमात्मा रे भजन गाणा, धन्यावाद दैणा ते महिमा करणा

जेड़ी तिन्हा ने म्हारे पुरखज, अब्राहम कने लेई थी। ⁷⁴ कि म्हारे दुसमणा रे हत्थां का असां जो बचाणा ताकि असी बगैर इरे रे परमात्मा री सेवा करदे रहन। ⁷⁵ कने सारी उमर, हर रोज, परमात्मा रे अग्गे पवित्तर*⁹ कने मन का धर्मी रेहई सकन। ⁷⁶ निक्केया अवे तू परम-परमात्मा रा भविष्यवक्ता होणा। तैं प्रभु रे अग्गे-अग्गे चली करी तिन्हेरे मणूआं जो तयार करणा। ⁷⁷ ताकी लोकां जो ए सखाई सको कि, तुसां रा उद्धार तुम्हारे पाप्पां री माफी कने ही होणा। ⁷⁸ परमात्मा री असां पर इदेहई मैहर होणी कि तिन्हा ने स्वर्गा का म्हारे पाप्पां जो माफ करणे ताई इक मसीह भेजणे। ⁷⁹ ए मसीह उन्हा मणूआं ताई आणे जेहड़े कि परमात्मा जो जाणदे बी नी ते से मौत रे मुंहआ मिन्ज चलेरे हिन। ते मसीह ने तिन्हा जो सान्ति रे रस्ते पर चलणा सिखाणा। ⁸⁰ जिय्याँ-जिय्याँ जकरयाह रा निक्का, युहन्ना, उमरी मिन्ज बधदा गया, तिय्याँ ही से आत्मिक तरिके कने बी पक्का होन्दा गया। इस्त्राएली मणूआं रे सामणे आणे का पैल्ले से बणा मिन्ज ही रहन्दा थिया।

⁹**1:75 पवित्तर*** पाप माफ होई जाणे का बाद दुबारा कदि बी पाप नी करणा ता लोक पवित्तर मन्ने जान्दे।